

Viši zamjenik Visokog predstavnika Matthias Sonn pozvao građane da insistiraju na svojim pravima u slučajevima nekompetentnosti, neefikasnosti i korupcije zvaničnika

Viši zamjenik visokog predstavnika Matthias Sonn je danas pozvao građane BiH da se zauzmu za svoja prava u slučajevima kada političari i zvaničnici ne rade pravilno svoj posao. U sklopu serije predavanja iz kursa o podučavanju demokratije i ljudskih prava, viši zamjenik se obratio studentima Druge gimnazije u Sarajevu u vezi sa ulogom organa vlasti i građana u demokratskom društvu.

Ambasador Sonn je konstatovao da je široki spektar prava ugrađen u Daytonski mirovni sporazum, što uključuje i pravo na pošteno suđenje, pravo na privatnost, pravo na slobodu izražavanja mišljenja, kao i pravo na slobodu kretanja i mjesto življenja prema vlastitom izboru. Ova i ostala prava su podržana međunarodnim sporazumima koje je potpisala Bosna i Hercegovina, kao što su Međunarodni pakt o građanskim i političkim pravima, Konvencija o uklanjanju rasne diskriminacije i Konvencija o pravima djece. U ovim sporazumima je utvrđena obaveza zemalja potpisnica da redovno izvještavaju o postignutom napretku u ovim oblastima. Međutim, BiH još uvijek kasni sa izradom čak 14 takvih izvještaja.

“Slično tome, od devet zakona vezanih za zaštitu ljudskih prava, čije usvajanje predstavlja jedan od uslova za pridruživanje BiH Vijeću Evrope,

samo su tri usvojili domaći zakonodavni organi,” naglasio je ambasador Sonn. “Ostalih šest je morao nametnuti visoki predstavnik.”

Viši zamjenik visokog predstavnika je predočio argument da građani BiH “i dalje imaju tendenciju da vjeruju da su zvaničnici ti koji imaju kontrolu, da se njima uvijek treba povinovati, ili da im se mora davati mito. Na autoritete se uvijek gleda sa sumnjom, strahom ili, jednostavno, cinizmom. On je rekao da se korumpirani i nekompetentni zvaničnici moraju odstraniti, dok građani moraju insistirati na svojim pravima.

“Imate pravo na slobodu od korupcije,” rekao je studentima. “Političari koji čine usluge svojim prijateljima krše to pravo. Imate pravo na efikasnu državnu službu. Drske, nemarne, arogantne i neuslužne birokrate krše to pravo. Imate pravo na zaštitu od kriminala. Nepošteni službenici policije i oni koji imaju predrasude krše to pravo. Imate pravo na kompetentnu vladu. Nemarni, sebični i opstruktivni političari krše to pravo.”

Nakon predavanja je uslijedilo postavljanje pitanja, od kojih je jedno bilo zašto druge zemlje ne prihvataju akademske kvalifikacije BiH. U vezi s tim, ambasador Sonn je ukazao na obavezu entitetskih ministarstava obrazovanja da odmah izvrše neophodne pripreme za potpisivanje Lisabonske konvencije iz 1997. godine od strane BiH, što će, između ostalog, dovesti do međunarodnog priznavanja srednjoškolskih diploma iz BiH.

[Pogledati kompletan govor](#)